

Das zwey Tausent

fünfhundert Doppelsoldner / vnd funff-
 zehen hundert Schützen / sich in freiem Felt / ge-
 gen zwey Tausent Kürisser oder Sperrreuter /
 in sicherheit begeben mögen.

Under den vornembsten Kriegshaten / die man hoch vñ vortreff-
 lich helt / geht dise / als eine der schweresten vñ seltsambsten / billich
 im ersten Blid. So gibt auch dem Hauptman / so damit zu glück-
 lichen ende kompt / ein herzlich zeugnuß vnd kundschafft seiner
 dapfferkeit vnd vorsichtigkeit. Vnd wie es sehr wenig hat / die dessen vñ-
 derfangen wolten / auß forcht erwan hierin zusehen: Also finden sich we-
 nig die glauben / daß solches beschehen möchte / weil es sich gar selten zu-
 tret / vnd gleichsam als vngewonet ist. Diese Opinion wolt ich nicht ver-
 werffen / wan sie auff die Indispositiō / in welcher jetziger zeit vnser Fuß-
 volck ist / als daß ihnen in solcher gestalt dergleichen zuerichten vnmög-
 lich ist / sehen vnd achtung geben. Dañ gewiß / weil sie den gebrauch der
 langen Spiessen nicht mehr / zugleich auch kein rechte Kriegs Disciplin
 vnder ihnen haben / halte ich nicht / daß ohne dieselbigen / zehen Tausent
 Schützen in ebenem freiem Felde / für allein sechs hundert Kürissern oder
 gerüsten Sperrreutern sehen lassen dürffen. Aber mit den vier Tausent
 Soldaten / dauon ich zu reden vor habe (jedoch vnserer vnd keiner andern
 Nation) wan selbige wol ordinirt / gehorsam / vnd auff ihre alte manier
 gerüst seyn / wil ich maintainieren vnd erhalten / daß solche ein dergleichen
 abzug / ohne ihren schaden wol thun können.

Wann ich dan die anzahl Fußvolcks / dauon ich gemelt / die im Krieg
 erfahren vnd instituirt wehren / hette / wolt ich solche nachfolgender ge-
 stalt in Ordnung stellen / als nemlich in zwo Schlachtordnungen vnd
 Hauffen / jedwedere von zwölffhundert vnd fünffzig gerüster Doppel-
 soldner mit langen Spiessen / vnd dan sibenhundert funffzig Schützen.
 Vnd wann man fragt / warumb ich solche eher in zwo / als allein ein ord-
 nung stelle: Antwort ich / damit eine die ander desto besser favorisirn vnd
 entsetzen könne / wie man besser auß hernach gesetzter Figur / die allein dis
 werck zu besserer verstendiger nachrichtung hieher verordnet worden / ler-
 nen vnd abnehmen kan.

W ij

Figur